

WELA WA KHUMADIONDJO



Okoko Wakashisho

Jesu akawaukela wela one ati: Untu akona l'atei anyu, lam'endi la ekoko lukama, naka ndi ambudimanya omotshi, ku ndi hatshiki akumi divwa la divwa l'usui dia ntuyanga one wushishwi edja ndu lam'ayunduwena? Lam'ayunduwena, ndi ayuwahe l'aheka, ayongenangena. Lam'ayundukuma lakandi ndi ayeta engenyi andi la asukanyi andi; ayuwatela ati: Nyongenengene la mi, ne dia lambena okoko ami wakashisho. Dimi lambunyutela nti, Wuhu ako mbayuyala ongenongeno utamanya l'ulungu lu dikambu dia untu a kolo otoi lukadimudi utema, uleki dia antu akumi divwa la divwa wahahumbi nkadimula etema.

Etinyi Ka Fesa Kakashisho

Kana umuntu akona, lam'endi la tinyi dia fesa dikumi, naka ndi ambushisha etinyi kemotshi, ku ndi hahetsha tala, hombe luudu, la hayangi l'eteti edja ndu lam'ayundukiena? Lam'ayundukiena, ndi ayeta engenyi andi la asukanyi andi. Ndi ayuwatela ati, Nyongenengene la mi ne dia lambena etinyi kakamashisha. Okone lambunyutula nti: Ongenongeno ndjalaka lu ashu w'andjelo wa Unyashungu lu dikambu dia untu wa kolo otoi lambukadimula utema. (Luka 15:3-10)

Ona a Lutshitu

Ku Jesu akati ati: Untu omotshi aki la ana apami ahendi. Ona kushi akatela shi ati: Papa, umbisha etenyi ka diango diayuyala le mi. Ku ndi akakahanya diango diandi. Kem'edja, ona kushi akasanganya diango diandi tshe, akatshu lu lokendo lu kete y'etali. Ndi akatuhandjula diango diandi lu akambu wa lutshitu wakandatshaka. Lam'akandamani diango diandi tshe, ndjala ka kasha ka wulu kakayala lu kete sho. Ndi akatatela mpumba diango. Ku ndi akatshu akatekesanela la untu omotshi la lu kete yako. Ku untu ako akutumi dia ntulesha sumbu l'usui. Ku ndi akalangi ndutsha dikundju la pusu yakalekaka sumbu. Nduku untu lakawusha ema a nde. Keli lam'akandatshuti, ndi akati ati: Ndi ma efula dieli la ekambi wa papa, ndu dikina ladiku, ku dim'one avo la ndjala lindu li! Dimi layunela, layutsho le papa; layuwutela nti: Papa, dimi lakatshela ulungu kolo, lakatshi kolo ndu lu ashu aye. Ololo ami hakuki dia vo mbetami ntu vati: On'aye; umbete uku ukambi aye omotshi. Ku ndi akunela, akayi le shi. Keli lam'akindi tshalula, shi akawenyi, akangasana la ketshi, akalawo, akatukhumbatela lu kingu, akanonana la ndi. Ona akawutela

ati: Papa, dimi lakatshela ulungu kolo, ndu lakatshi kolo lu ashu aye. Ololo ami hakuki dia vo mbetami ntu vati: On'aye. Keli shi akatela ekambi andi ati: Nyela ukutu wuleki ololo, nyolotsha, nyuwudji lohete lu lunya landi, la sabata l'ekulu andi. Nyela osongo wa ngombe wununyi, nyudiaki keli tuli, tongenengene. Ne dia on'ami one akavu, ku ambuyala la lumu ntu; ndi akashisho, ku ambenama. Ku vo wakatatela ngenangena. (Luka 15:11-24)

Usi Samariya w'ololo

Jesu akati ati, Untu omotshi akatatshokaka uma la Jerusalema utsha la Jeriko. Ndi akoto lu anya w'apotodi. Vo wakukulula ahondo, wakokomola, wakatshu, wakatshiki afunda las'eku la nyoi. Olombodi omotshi akatatshokaka lu mbuka keso, lam'akandawenyi, ndi aketi l'okenge ukina. Ndu usi Lewi pupu, lam'akandakumi lu dihuli so, lam'akandawenyi, ndi aketi l'okenge ukina. Keli usi Samariya omotshi, lakatatshokaka lu lokendo, akakumi lu dihuli diakindi. Lam'akandawenyi, ndi akangasana la ketshi. Ndi akasukana la le ndi, akawombe puta, akatela iso la wanu loko. Ku ndi akawahe lu nyama kandi, akayi la ndi lu pangu k'angendangenda. La wedi a pindju ndi akatundja denariyo* pendi, akasha kanga pangu, akati ati: Ulamaki. Lam'ayumukalula dimi layukufuta kene tshe kayuyushisha lu dikambu diandi. Le untu lakoto lu anya w'apotodi, akona akanaye akayala unyandi l'atei w'antu aso asatu? Ndi akati ati: One lakawuki ketshi. Jesu akawutela ati: Utshu, utushi pupu. (Luka 10:29-37)

****Denariyo eli yediko y'akuta yakuka nsumba ma dia lushi otoi.***

Ekambi w'Ekambo wa Kolo

Nyulungi wela ukina. Kanga luudu omotshi akiko lakakambi ekambo k'elua. Ndi akahiki lukumbu l'etamba wa lumu l'utshimba ato; akatshimi difuku dia mamulaka elua loko; akahiki luudu l'etangelu. Ndi akakitshikela ekambi w'ekambo, akatshu lu kete kina. Lam'akasukana eleku ka dielelo di'elua, ndi akatumi ekambi andi le ekambi w'ekambo dia ntosa elua andi. Ku ekambi w'ekambo wakose ekambi andi: wakakomola omotshi, wakadiaki ukina, wakuki ukina ave. Ndi akatumi ekambi andi ekina wuleki wa ntundu efula, ku vo wakâtshela pupu. Keli l'okongo diku ndi akâtumela on'andi; akati ati: Wayolemia on'ami. Keli lam'akenyi ekambi w'ekambo ona, vo wakatanela vati: Ukito uku. Nyeso, tûdiaki, katose sangu diandi. Ku vo wakawundi, wakusukula uma l'ekambo, wakudiaki. Okone

lam'ayuya kanga ekambo k'elua, ukundi ayundutshela ekambi w'ekambo eso? Vo wakawutela vati, Ndi ayudiaka antu wa kolo aso tshe, ayutshikela ekambi ekina ekambo, wane wayuwushaka elua lu deku diawo. Jesu akawambula ati: Nyu kumbala lu afundelu ati:

Dive diakatuni ambiki a luudu,

Mbakayala ote wa tshuku.

Dikambu so diakayala uma le Khumadiondjo

Ndu dio dieko dikambu dia mamba lu ashu asu.

(Mateu 21:33-43)

Esekaseka dikumi wa dimuma

Lushi loso, diulelu dia l'ulungu diayuyala uku esekaseka dikumi wa dimuma, wakose atala awo, wakatshu la ntusangela utshuki a wadi. Atanu awo waki dinginya, atanu waki la yimba. Lam'akose akanga a dinginya atala awo, vo kombosa iso. Keli akanga a yimba wakatshu la iso lu sayi yawo ndu l'atala awo. Lam'akatubiya utshuki a wadi, esekaseka ako tshe wakanyingonyingo, wakalali djo. L'asa ndeki, wakadji dielu vati: Enda, utshuki a wadi! Nyuyi la ndjusangela. Ku esekaseka eso tshe waketo, wakalongosola atala awo. Akanga a dinginya wakatela akanga a yimba vati: Nyutusha yema y'iso ne dia atala asu wutsha nyimala. Keli akanga a yimba wakâkaluya diui vati: Iso hakuki le su ndu le nyu undu. Nyutshu le wane watusundjaka, nyutuyasumbeli. Lam'akawatshu dia ntusumba iso, utshuki a wadi akayi. Okone wane wakayalongosola wakoto la ndi lu dambu dia tshuki, ku wakadihi lukuki. L'okongo diku, ndu esekaseka ekina wakayi, wakati vati: Khumadiondjo, Khumadiondjo, utudihula. Ku ndi akâkaluya diui ati: Mete kanyutelami nti: Dimi halanyeyi. Okone nyulungamelaki, ne dia nyu hanyeyi lushi kana unya.

(Mateu 25:1-13)

© C.E.R.S. - B.P. 1673 Kananga

République Démocratique Du Congo

Email: 33eme.cers.lit@gmail.com

<http://www.33eme-cers.org/>